



Las soras vendan gl'Albertushof

La mesjamna ha la claustra da Glion communicau ch'il cussegl general hagi decidiu da sedeliberar digl anteriur bein puril **Albertushof**. La claustra ha surdau l'incarica da vender ad in biro indigen. Igl ei in vast complex cun casas, clavaus, nuegls e remisas.



Il bein puril **Albertushof** sur Glion vegn vendius.

AUGUSTIN BEELI/FMR

«Ussa eis ei definitivamein aschia. Nus essan se-decididas da vender quei areal», conferma sora **Annemarie Müller** en discuors culla FMR. La priura dalla claustra da Glion fa allusiun alla comunicaziun ch'ella ha tarmess ier endamaun allas medias. «Il cussegl general ha fixau en sia strategia a liunga vesta da vender tuttas immobilias che surveschan buca directamein al habitar dallas soras», ha ella scret. Il menaschi puril dalla claustra ei quasi il «filet», il meglier toc, dallas immobilias claustralas. Tochen il 2003 han las soras manischau sezzas quei bein. Gl'areal s'extenda naven dalla via da Ruschein encunter vest e cumpeglia ina surfatscha

da 14 166 m². Quella include la casa d'ina ed ella vischinonza la casa da treis famiglias. In grond gagliner, in nuegl da pors cun scrinaria, ina gronda stalla e diversas remisas s'audan tier la medema parcella.

Prioritad: garantir la pensiun dallas soras

«Nus essan interessadas da vender tut en in toc», declara la priura generala. Finamira dalla fundaziun sco proprietaria eis ei da garantir a liunga vesta l'existenza dalla claustra. Quella fundaziun claustrala exista dapi il zercladur 2021. Tochen lu era la claustra organisada giuridicamein sco uniun. «L'uniun exista **vinavon**, la fundaziun denton finanziescha il futur dalla cuminonza», explichescha la priura generala.



L'uniun – el senn giuridic – possedi il funs agricol, pia era la parcella digl **Albertushof**, e la fundaziun las ulteriuras immobilias, declara ella.

Sora **Annemarie Müller** ei buca mo priura generala, mobein era presidenta dil cussegl da fundaziun. Sco ella gi el discuors culla FMR ei il temps arrivaus ch'ins sto sedistaccar d'objects che surveschan buca direct al scopo. «La fundaziun duei finanziar la veta monastica e l'activitad apostolica dallas soras **dominicanas** da Glion, e plinavon garantir la pensiun e la tgira dallas soras tochen la mort», declara sora Annemarie. Quei pretenda ils mieds finansials necessaris.

Albertushof furneva tut

Conform al principi monastic ei la claustra da Glion stada bunamein 140 onns autoproveditura. Gl'Albertushof furneva tutta vivonda che claustra, spital e scola duvravan, ils products da latg, legums e truffels, mèl d'aviuls, fretgs e must, ovs, garnezi, carn ed era fluras. Durent quels onns han las soras da Glion giu gronda influenza ella veta sociala dalla regiun. Ellas han luvrau egl apostolat, ein s'engaschadas el spital, en scola ed en pleivs. Quels temps ein

vargai. Il diember da soras ch'ei in ella casa materna lubescha buca pli da surprender incaricas ordeifer. Ils pensums actuals interns pretendan grondas unfrendas finansialas. Perquei eis ei clar che la vendita dil menaschi puril gida ussa autruisa la claustra cun sia casa materna.

Il recav dalla vendita drovan las soras per finanziar lur veta, e buca per specular. Il cussegl general ha surdau la vendita digl **Albertushof** ad in biro indigen. Quel vegn a publicar l'offerta ils proxims gis. Cunquei finescha in ulteriur capetel ella historia dalla congregaziun da Glion. Quella ha entschiet 1865 cura ch'il spital Gion Fidel Depuoz ha fundau el quartier da Sontga Clau ina cuminonza religiusa cun spital annex. Gl'onn 2015 han las soras festiva il giubileum da 150 onns. Igl ei stau il mument da ponderar la strategia dil futur.

«Nus essan interessadas da vender tut en in toc.»

sora **Annemarie Müller**, priura generala, Glion

Tgei schabegia cun la scola mercantila?

Ina damonda resta aviarta: Sedistacca la claustra era dils baghetgs digl anteriur institut s. Giusep e dalla Scola **Vinavon**? Era quels baghetgs surveschan buca pli al scopo direct, ni dalla claustra ni dalla fundaziun. La priura generala **Annemarie Müller** rispunda: «Il contract culla Regiun Surselva scada aunc buca oz e damaun. Era leu essan nus vidlunder d'encurir sli-giaziuns.» Sora Annemarie renda attent ch'il tract da scola seigi colligiaus directamein culla Casa Sentupada e culla claustra, perquei seigi ina midada da maun pil mument buca en discussiun. L'anteriura scola da puras e gl'anteriur institut s. Giusep dattan dapi biars onns sut-tetg allas differentas scolas dil Center da formaziun Surselva. La Conferenza dils presidents dalla Regiun Surselva ha deciduu da dislocar tuttas partiziuns el baghetg niev dalla staziun, quel vegn aviarts sil pli baul en quater onns. (fmr/abc)



COMMENTARI

Tgi sa seprestar l'entira «petta»?

AUGUSTIN BEELI/FMR

La primavera vargada ha il menaschi dalla claustra da Glion organisau ina fiera da plugls sil bein puril **Albertushof**. Ei ha fatg la paretta ch'ei seigi gl'emprem pass per sedistaccar da quell'immobilia. Sin damonda directa dalla FMR haveva la claustra dementiulezza gada ils plans d'ina vendita. Las speculaziuns en quei connex han buca calau. Da principi havevan ellas entschiet gia il 2015, cu il davos migiur digl **Albertushof** ha visau il contract culla claustra. Ussa eis ei realitad: las soras vendan quei areal. Ils temps ein semidai e las soras drovan buca pli funs e beins entuorn la claustra.

Ina gronda surfatscha da varga sis hectaras funs agricol sper e sur gl'**Albertushof** ha la claustra vendiu onn vargau. Igl ei stau ina buna caschun per in pur indigen. Il prezi ch'in cultivader paga ozilgi per funs, en in liug spundiv, ei favoreivels e buca da cumparegliar cun tal ch'ins paga en zona da baghegiar. Ussa vegn ina surfatscha da varga 14 000 m2 cun divers baghetgs, curtgins ed orts silla fiera d'immobillas. Vender in tal object ei lucrativ ed ins sa mo specular dil

prezi. Ins sto esser realistics, pertgei l'entira parcella ei attribuida alla zona d'agricultura. Aschia sereduceschan las queidas d'eventuals speculants. In object da rendita sa gl'**Albertushof** pia strusch daventar. Ins sto sedumandar tgi che savess seprestar da cumprar la parcella entira ed entratga? Quei fuss quasi ina miracla. Forsa ch'ina instituziun cun intent social ha zanuva reservas ed ina bun'idea? Giu la Bassa dat ei avunda talas.

Forsa s'annunzian investurs che vulan baghegiar habitaziuns per indigens. Talas han ins denton baghegiu all davos onns detgavunda a Glion. Allas soras pon ins cuir il meglier recav pusseivel. Duront decennis han ellas gidau, manischau, giu quitau, instruiu ed organisau. Bia bien han ellas prestau. Ussa sto la cuminonza mirar per sesezza. Ella drova las finanzas per garantir allas soras la pensiun. Ins pudess era cuir ch'igl **Albertushof** manteness in toc da sia missiun ed intenziun oriunda. Mo tgi sa seprestar l'entira «petta» cun casas, clavaus e nuegls? Donn eis ei che la claustra ha buca spitgau avon in onn e miez cun vender tut il funs agricol vischinont digl **Albertushof**.